

# JUT

## Pepa Jut iŋgere panzi kalo-tawana tamâta

Jut nde Yesu tai tonje (Matai 13:55, Malaka 6:3), aku iŋgere ŋgua ŋine panzi kalo-tawana tamâta ŋgu pinde. Jut isama tu kinzi pananâŋa tamâta lajeŋa pinde nde sikai wurâta kaika ŋana siyaula kinzi tamâta nenzi kalo-tawana, kala iŋgere ŋgua kaika ileleanzi tamâta ŋinde. Kinzi lajeŋa tamâta ŋinde uru siveta mâsi sakamao, ku sipanananzi kalo-tawana tamâta ŋana soka mulinzi. Jut itula pwataki tu Maro Kindeni ne wisi-nâna ikeno panzi tamâta ŋinde, aku muli ŋga kinzi ma sikai pareŋa-nia sakamao.

---

<sup>1</sup>Naŋa Jut, naŋa nde Yesu Kirisi ne wurâta tamâta, aku Yamesi tai kala naŋani. Naŋa aŋgere ŋgua lâ pepa ŋine tini imâ pa miki tamâta ŋinde Maro Kindeni muŋgani isarawami lâ. Kinda Tamânda Maro Kindeni ilo ndo keno pami, aku Yesu Kirisi tamwata uru ikatona miki sondo ndo.

<sup>2</sup>Maro Kindeni ne kalo-sukâŋa wa wisi-pisi wa tini-mwasa wa ipâŋga ŋalae lâ ilomi kalomi.

### **Pâri ara ne kazâŋa tamâta nde simâ sipâŋga lâ kinzi kalo-tawana tamâta ŋgu ŋgininzi**

<sup>3</sup>Ŋingu-nambwe wukale, nia ndoyo naŋa ilonŋu patea tu ma aŋgere ŋgua lâ pepa tini ŋana kinda rârâni nenda kalo-tawana kâ. Aku naŋa aluku lâ ŋana aŋgere ŋgua ŋinde lâ pepa tini ku ao imâ pami. Andeta kala ŋine naŋa ilonŋu patea tu naŋa ma aŋgere ŋgua kaŋa tonje lâ pepa tini imâ walele nâ pami. Naŋa ilonŋu tu apu tini kaika pami, ŋana miki ma kamandi kaika ŋana katiŋgi pâri ara ne kazâŋa tamâta nenzi ŋgua kâ. Siŋgani, Maro Kindeni kalo-tawana ndainani nâ ilua i ne tamâta kinda. Aku tamâta tonje ikura ŋana ilele kalo-tawana ŋinde ipâŋga kie tonje, ande tia. <sup>4</sup>Tamâta pinde nde sipavea nâ ku sipâŋga simo lâ kalo-tawana tamâta ŋgu ŋgininzi. Nia ndoyo, Maro Kindeni ipa ŋgua tu i ma ipare nia panzi tamâta sakamao ŋinde. Kinzi uru silele ŋgua ŋana Maro

Kindeni ne wisi-wisi kâ ipânga kie tonge, ñinennga siporo ngua lajeña tu Maro Kindeni isâu panzi ñana sipalulua tininzi potomule kâ. Kinzi tamâta ñinde sipu mulinzi pa nenda Maro Ñalae Yesu Kirisi, ina simbo nâ imo koipu ñalae.

<sup>5</sup>Muṅgani Maro Ñalae iyautenzi Isrel ngu piti lâ Isip tâno, aku ivetanzi simo ara nâ. Andeta muli nga, ande izavarunzi Isrel tamâta ñinde kalonzi tawana i tia. Miki kasama ñinde lâ, andeta naña atu apaño ilomi kalomi tu miki ma kalomi ngere kilo ñana mâsi ñinde kâ. <sup>6</sup>Aku ara ñana miki ma kalomi ngere ñananzi aṅelo tona, kinzi ñinde muṅga silaṅa sipole Maro Kindeni ne tukuña ku sipile nianzi. Ñana nenzi vetâña ñinde kâ, ande Maro Kindeni ipanzi lâ wâlo kaika ku ionzi silâ mbââ ilo. Kinzi ma simo mine lâ nia kondoma ñaṅa ndo ku simo nâ. Kinzi nde sindamwa Maro Kindeni ne zo ñalae, aku lâ zo ñinde i ma ipare nia sondo panzi. <sup>7</sup>Aku ara ñana miki ma kalomi ngere ñananzi tamâta muṅga simo lâ Sodom lawea wa Gomora lawea wa lawea pinde keno nia ñinde tona. Tamâta ñinde uru siveta mâsi potomule kie taituni, itogo kinzi aṅelo sakamao ñinde muṅga siveta mine. Kinzi sipaveta kuku mâsi sakamao ndo, aku sipalulua warakanzi tininzi potomule ndo. Opopo, kinzi tamâne sipalulua tininzi kunzi tamâne! Mine kala Maro Kindeni isupwa yââ kaika ñana izavarunzi kâ, aku mâsi ñinde itula pwataki tu kinzi tamâta mine ma muli simo yââ ñalae ne mbââ ilo ikura zo rârâni. Maro Kindeni ilo tu kinda ma kalonda ngere ñana vetâña ñinde rârâni, aku taṅgeṅge ñana mâsi potomule ñinde.

<sup>8</sup>Andeta kala ñine tamâta pinde simâ sipânga lâ, kala simo lâ kalotawana tamâta ngu ṅgininzi. Kinzi tamâta ñinde uru sipaveta kuku vetâña sakamao ndainani nâ. Kinzi nenzi mbupuleña kie-kie uru ipaño ilonzi kalonzi, kala sitambira karaenzi ilâ tu siveta mâsi sakamao ndo, aku ñinde iveta muso ñalae panzi. Kinzi tininzi pwâka tu Maro Kindeni ma ikai maro panzi, aku siporo ngua pavaligiña panzi samba ne aṅelo. <sup>9</sup>Taitu kinzi aṅelo uru siporo ngua soki mine ilâ pa nenzi kazâña tamâta, ande tia. Muṅgani, lâ zo ñinde aṅelo nenzi koipu Maikel ipawa ngua kuku Sadana ñana Mose karae kâ tu ma ea ikai, ande Maikel imege nâ. Mine kala i ñandai isowe ngua soki tonge lâ Sadana tini nga. Iporo mine tu, “Maro Ñalae ma ipare nia pa noko!”. <sup>10</sup>Aṅga tamâta ñinde uru siporo ngua soki ilâ pa kekelele ndia rârâni sizizâla ñana ñinde. Kinzi sipânga sitogonzi ṅgoa ṅgoi mine, nenzi ilo-kalo tia ndo. Mine kala kinzi uru siveta vetâña ndia warakanzi ilonzi papa ñinde. Aku nenzi vetâña ñinde ma izavaru warakanzi ndo lâ.

<sup>11</sup>Opopo, mâsi sakamao ndo ma ipânga panzi tamâta ñinde! Kinzi sipaveta kuku Adam natu Kein ne vetâña. Kinzi ilonzi tu sikai mbaliña nâ. Mine kala sitambira warakanzi silâ ñana siveta vetâña potomule ñinde ngua-tulâña tamâta lajeña Balam muṅga iveta. Aku kinzi taṅanzi

kaika pa Maro Kindeni, itogo Kora muŋga taŋa kaika mine. Ŋana nenzi vetâŋa ŋinde kâ, ande Maro Kindeni ma izavarunzi ndo lâ.

<sup>12</sup>Lâ zo ŋana miki kalo-tawana tamâta kapasau kamâ taitu ŋana kaka kâŋa-nuŋa kâ, ande kinzi tamâta sakamao ŋinde uru sika kumi, aku ŋinde iyaula nemi kâŋa-nuŋa ŋinde. Kinzi mainzi tia ndo, kala uru sika wa sinu ŋalae tina. Kinzi ilonzi keno pa warakanzi nâ. Tamâta ŋinde sitogo take-take iyoka kaa nâ, karâzi tia, aku lawea itapala ilâ wa imâ wa. Aku kinzi sitogo kâi tonŋe, i ne zo ŋana ipula kanaŋo kâ ipâŋga lâ, andeta ipula kanaŋo tonŋe tia, kala itogo kâi ŋinde imâte lâ. Kâi mine ma duvi mburuŋa kâki lâ, kala ma imâte ndo lâ. <sup>13</sup>Tamâta ŋinde uru siveta vetâŋa potomule kie-kie lâ tamâta naonzi. Mine kala kinzi sitogo tâi isuka kâki imbware ku iŋele toa, aku nenzi vetâŋa potomule ŋinde ipâŋga nia yo, itogo tâi imbwa ku ne maka ipâŋga tâi kulu mine. Aku kinzi simo sitogonzi pitu pinde lâ samba tini uru sikai nenzi nzâla sondo tia. Mine kala Maro Kindeni ipatea nia kondoma ŋaŋa ndo panzi, ŋana ma silâ simo nia ŋinde ku simo nâ.

<sup>14</sup>Muŋgani, ŋgua-tulâŋa tamâta Enoko, ina ipâŋga lâ Adam ne vâsa ŋgu, ande itula ŋgua pwataki ŋana vetâŋa ŋine ma muli ipâŋga panzi tamâta sakamao ŋinde kâ. Iporo mine tu, “Maro Ŋalae ma iyoka tavanzi ne aŋelo kambwaŋenzi ŋalae tina simâ. <sup>15</sup>Maro Ŋalae ma imâ ŋana ionzi tamâta rârâni silâ pa i ne ŋgua nia, ŋana ma ipare nia panzi kâ. I ma ipare nia panzi tamâta rârâni ŋinde muŋga sipu mulinzi papa i, ŋana vetâŋa soki rârâni siveta ŋinde. Aku i ma ipare nia mine nâ panzi kiesaka tamwatanzi ŋana ŋgua pavaligiŋa rârâni muŋga siporo papa i.” Enoko itula ŋgua mine. <sup>16</sup>Tamâta ŋinde uru wisinzi nâna ŋana vetâŋa ndia ipâŋga panzi, aku siporo ŋgua soki-soki ŋananzi tamâta rârâni. Kinzi sipaveta kuku vetâŋa potomule ndia ilonzi papa ŋinde. Kinzi kawanzi kâki sipandekâna warakanzi nâ, aku situ ŋgua mâru-mâru panzi tamâta ŋana sitapa nenzi mbaliŋa saŋenzi.

#### **Ara ŋana kinda nenda kalo-tawana ma ikeno kaika nâ**

<sup>17</sup>Niŋgu-nambwe wukale, ara ŋana miki ma kalomi ŋgere kilo ŋana ŋgua rârâni nenda Maro Ŋalae Yesu Kirisi ne pâri-tamâta muŋga situla pami ŋinde. <sup>18</sup>Kinzi sipaimi tu, “Muli ŋga, lâ zo ŋana tâno ne zo laiti ŋana marumbu kâ, ande tamâta pinde ma simâ sipâŋga, ku ma siporo ŋgua pavaligiŋa pami. Kinzi ma taŋanzi kaika pa Maro Kindeni, ku ma sipaveta kuku vetâŋa potomule ndia warakanzi ilonzi papa ŋinde.” <sup>19</sup>Tamâta ŋinde uru sipu kinzi kalo-tawana tamâta ŋgu simo pwapwataki. Kinzi nenzi ilo-kalo potomule nâ ikai poe kaika pa nenzi vetâŋa, aku Koroani Sapâŋa ŋandai imo ilonzi ŋga.

<sup>20</sup>Aŋga miki, niŋgu-nambwe wukale, ara ŋana nemi kalo-tawana ma ipâŋga kaika ndo lâ ilomi kalomi. Miki nemi kalo-tawana ŋinde nde imo

sapâŋa lâ Maro Kindeni nao. Aku lâ zo ndia miki kakai noŋa, ande ara ŋana Koroani Sapâŋa ne walo ma ikai poe pa nemi noŋa ŋinde. <sup>21</sup>Maro Kindeni ilo ndo keno pami. Mine kala miki ma kapatâpa warakami piti lâ i ne tini-mwasa ŋinde ilo ndimo. Aku muli ŋga nenda Maro Ŋjalae Yesu Kirisi, ina kalo-sukâŋa warika, ma via mao ilami, ma kamo ara mine ku kamo nâ. Ara ŋana miki ma kamo kao tinimi nâ ŋana zo ŋinde i ma iveta mine pami.

<sup>22</sup>Tamâta pinde nenzi kalo-tawana ikeno kaika tia. Ara ŋana miki ma kalomi sukâŋa ŋananzi tamâta ŋinde. <sup>23</sup>Aŋga tamâta pinde, ande itogo kinzi simo yââ ŋalae ne mela-mela tini laiti. Ara ŋana miki ma walele nâ kakainzi piti kilo ku katula nzâla ara panzi. Aŋga tamâta pinde nde sipaveta kuku ilo-kalo sakamao ne vetâŋa muso. Ara ŋana miki ma kalomi sukâŋa ŋananzi tamâta ŋinde tona. Andeta kapakatona sondo, aku kamo malawae ndo ŋana nenzi vetâŋa potomule ŋinde kâ. Tia ma vetâŋa ŋinde iveta muso ipâŋga lâ miki ilomi kalomi tona.

#### **Kinda ma tapanea Maro Kindeni tasuka i ŋa kâki**

<sup>24</sup>Maro Kindeni ikura tu ikatona miki sondo nâ, ŋana nemi kalo-tawana ma imbe tia kâ. Ikura tu ikaimi kalâ tava ilomi mbâra-mbâra ndo kamandi i tamwata nao, aku miki ma kamo tava ndekâŋa ŋalae tina. <sup>25</sup>Ara ŋana kinda ma tapanea nenda Maro Kindeni, ina kala nenda Yautâŋa Tamwata taituni. Ŋana nenda Maro Ŋjalae Yesu Kirisi ne ara kâ, ande kinda takura tu tapanea Maro Kindeni tasuka i ŋa kâki, ŋana tu i nde nenda koipu ŋalae. Ina Walo Tamwata, aku ikura tu iveta vetâŋa rârâni. I imo ikai maro pa kelekele rârâni. Nia ndoyo, lâ zo ŋinde i ŋandai ipulia tâno ipâŋga ŋga, ande i imo mine, kala zo ŋine uru imo mine nâ, aku i ma imo mine ikura zo muli-muli ku imo nâ. Mao.